

福建叢書

第一輯

福建省文史研究館編

明·福清
葉向高撰

蒼霞草全集
(十五)

福建叢書 第一輯之二

福建省文史研究館編

明·福清
葉向高撰

蒼霞草全集

(十五)

江蘇廣陵古籍刻印社

續文獻通考卷之二十七

謝

聖諭併乞休第四十八疏

奏爲恭謝

溫綸再懇

天恩哀憐允故事該文書官冉登捧出

聖諭到臣私寓諭元輔朕昨覽卿所奏知卿微傷
左足請假暫攝已逾旬餘諒必痊愈目今典禮
隆重國事繁多正賴卿等匡濟豈可久居私寓
宜卽遵旨速出入閣佐理以副朕佇望之意母

得再有托陳特諭欽此臣謹扶掖下床叩頭恭
謝又該臣以病患日深乞

賜骸骨奉

旨卿前以傷足請假朕意調理易痊柰何因此遽
興歸志今國家多事目前

聖母大禮未襄幾務煩難急需贊理卿調攝已久
稍可卽出入閣視事以慰眷懷不允所辭吏部
知道欽此臣終朝之間兩辱

溫綸一勤中使跼天跼地無以自容而中使又傳
宣

聖意必欲臣出是臣之病苦下情尚未足以動

夫聽其超生救死尚未有路也悲傷之極不覺對

中使而涕泗橫流幾至隕絕矣臣受事八年

陳乞無數向非馮依

靈寵結戀

恩私必不能延至今日情有所必窮而勢有所必

極今日固臣至窮至極之時也卽

皇上之所以留臣亦窮極而無以復加則何如放

臣一去使

君臣之間寬然有有餘不盡之意之爲愈哉目前

聖母大禮十完七八只有

山陵一事禮工二部自能任之臣查

累朝山陵之期大較不出百日內外蓋禮制固然
卽

梓宮久在

內殿亦爲非宜

聖母襄事當必不遠

皇上但一面允臣之歸臣未敢卽去俟匍匐携扶
哭送

聖母于郊外而後行以少盡臣子之心其他幾務

雖煩有臣從哲料理其大者不過

東宮講學補大僚起遺逸數事是在

皇上可以片言而裁該部可以奉

詔而請無所庸臣爲矣臣聞之狐死首丘臣區區
血誠惟欲以此一副骸骨歸死于先人塚墓
之傍至于

聖恩深厚無從報稱則惟有生生世世變爲蛇雀
化爲螻蟻以補此未了之念而已抑臣又有
言焉臣生平快口直腸語言不慎久典樞機
必招禍患數年來本章票擬皆臣一人謬戾

實多昨言者責臣

絲綸之重可以入幕而要求羅織之獄可以假途而得

旨舌端之意指自明筆底之風濤橫作臣甚愧之服之頃自杜門後卽告臣從哲一切稟擬不必相聞庶幾少贖既往之愆用紓天下之慮是亦臣報

國之一端也更望

皇上速允臣去以安人心臣不勝感激哀鳴之至

萬曆四十二年四月十三日

請存問申沈二輔臣疏

奏爲敬循舊典仰乞

天恩存問耆德輔臣事臣等查

累朝舊例大臣年八十以上有

存問之典而輔弼重臣又與他官不同遠如王鏊
謝遷毛紀賈詠近如徐階或年登八十或未
及八十皆蒙

特恩遣官存問前此庚戌之歲原任大學士沈鯉
八十臣等擬請

存問而士大夫間咸謂鯉以精忠亮節未登首輔

經綸康濟之猷未及盡究方當旦夕

召用以慰輿情不必遽舉此典臣等遂逡巡而不敢言今

徵綸尚稽而鯉年已八十四矣若復遷延不舉終是闕事今歲原任大學士申時行又登八十臣等竊念時行事

皇上日久在

綸扉十有四年當國之日居其大半老成持重深得輔相之體又當時政鏗急之後濟以寬和元氣漸復其調劑苦心蓋有天下人所不及

知而

皇上獨知之者優游林下二十餘年完祉備庥近
世罕見其與鯉名德壽考同在一時皆人倫
之領袖

聖代之光華也臣等查有毛紀等事例輒敢上聞
如蒙

皇上俯念二臣爲昔日舊人

特勅禮部查照舊規各差行人一員齎

勅前去存問仍量加賞賚用示優崇于以昭

聖主眷念耆宿之盛心而增

清朝巖居之盛事豈不美哉至于順輿情以行
召用是在

聖裁原不因此而相妨也臣等不勝願望之至

萬曆四十二年四月十三日

請發王尚書病疏及點巡視科道揭

該兵部尚書王象乾屢奉

明旨令署掌銓務業已接印管事矣頃又具疏以
病尚未痊請假調理其教職掣籤欲令司官
代行急選大選及會推諸事欲暫停止以待
新臣之至臣等竊以爲不可夫急大二選乃
祖宗舊制遵行已久豈容暫停內而部寺外而巡
撫向來懸缺不止十餘會推豈容再緩今若
槩行停止則銓政益壅人心益鬱甚非
皇上付託象乾之意也伏望立發原疏責令遵

旨速出完此大事吏治幸甚臣等又接得太僕寺卿陳禹謨等揭謂巡視科道無人本寺一應錢糧入者未敢徑收出者未敢輕放各邊年例撫賞等銀守候已久發解無期關係邊情甚非眇小臣從哲今早入長安門有遼東領銀委官告稱召募新兵五月無糧嗷嗷待哺恐生他變臣等聞之不勝凜凜更望皇上將原推科臣姚宗文道臣劉光復亟賜點用庶營務以重邊釁可消矣

萬曆四十二年四月十七日

謝

聖諭併乞休第四十八疏

奏爲頌辱

溫綸恭謝

天恩再陳愚悃事該文書官金忠捧出

聖諭到臣私寓諭元輔朕前已諭卿雖微傷左足
允假暫攝卽出何乃又有此奏卽今

聖母大典未襄無國家多事政務繁重正賴匡襄
贊理卿爲元輔豈忍久卧言去柰國事何其大
遼遺逸等事朕以悉知卿素公清直諒豈得以

浮言介懷宜遵屢諭安心卽出入閣佐理以副
朕佇望至意不必再陳特諭卿知欽此臣以病
困不能出至庭中拜伏只扶掖下床叩頭恭
謝竊惟

隆恩至此近世希聞欲匍匐勉仰答

聖心而力不能強欲瀝膽披肝少摅感念而口不
能宣惟有對中使涕泣而已臣病足未痊加
以宿疾如下血痔瘍新患如腦漏鼻衄一時
竝作萬苦俱叢七尺之軀累臣已甚臣亦自
厭其殘生矣人情窮急必呼天呼父母

皇上之恩臣念臣過于天地父母臣不控訴

皇上更將誰控

皇上以國事繁重苦欲留臣不知臣在此無益于國事之分毫而徒以累

君父之眷念多留一日卽增一日之罪古人欲休官者曰無官一身輕臣竊以爲無官萬罪解使臣得逭罪而去苟安林壑延醫問藥庶幾猶有痊可之期

皇上之于臣不啻起白骨而再肉之矣臣乞歸頻數孤負